

國朝常州駢體文錄

國朝常州駢體文錄參訂校刊姓名

仁和樊恭煦介軒

江陰繆荃孫穀風

江陰金武祥淮生

金匱趙起鵬雲九

宜興李祖榮子華

無錫秦鳳墀子治

陽湖呂繼午稼生

陽湖莊允懿心嘉

陽湖蔣偉仲嘉

陽湖蔣星熙叔明

陽湖伍學純潤之

武進莊蒞寬思緘

陽湖吳翊寅孟斐

向錄同郡先哲駢文置諸篋衍比來廣州從莊君
心嘉處增錄數家繆小山編脩復從京師鈔寄二
十餘首同鄉見者各分奉金從惠付刊莊君任之
尤力中間費絀樊介軒學使助成之助校錄者吳
君孟斐也書成謹書姓名于右以著諸君子崇長
雅道表章先民之功寄之不敏毋敢掠美焉十一
月十八日屠寄又記

國朝常州駢體文錄總目

第一卷

宜興陳維崧其年湖海樓文二十一首

第二卷

武進劉星煒圖三思補齋文十五首

第三卷

無錫秦蕙田樹峰味經窩文一首

荆谿葉翥鳳文一首

江陰王蘇儕嶠試峻堂文三首

金匱孫爾準平叔泰雲堂文四首

第四卷

陽湖洪亮吉稗存卷施閣乙集文上五十首

第五卷

卷施閣乙集文下十三首

第六卷

更生齋文十六首

第七卷

陽湖洪符孫幼懷齊雲山人文三十三首

第八卷

陽湖洪麟孫子齡澹則齋文十六首

第九卷

陽湖孫星衍問如問字堂外集文八首

第十卷

武進趙懷玉味辛亦有生齋文三十七首

陽湖惲敬子居大雲山房文二首

第十一卷

武進張惠言皋文茗柯文十二首

陽湖張琦翰風宛鄰文三首

第十二卷

武進張成孫子僑端虛勉一居文十一首

第十三卷

武進李兆洛申耆養一齋文上五十二首

第十四卷

養一齋文下十三首

江陰承培元守丹文一首

第十五卷

陽湖陸繼輅祁生崇百藥齋文九首

陽湖陸耀通劬文雙白燕堂文六首

第十六卷

金匱楊芳燦芙蓉裳芙蓉山館文上二十一首

第十七卷

芙蓉山館文下十四首

金匱楊揆荔裳桐華館文一首

無錫顧敏恆立方辟疆園文二首

第十八卷

陽湖劉嗣綰芙蓉初尚綱堂文三十六首

第十九卷

陽湖方履錢彥聞萬善花室文上十三首

第二十卷

萬善花室文下十八首

陽湖方駿謨元徵敬業述事之室文一首

第二十一卷

陽湖董基誠子詵移華館文十二首

第二十二卷

陽湖董祐誠方立蘭石齋文二十首

第二十三卷

武進董士錫晉卿齊物論齋文十三首

第二十四卷

荆谿周濟保緒味雋齋文十首

第二十五卷

陽湖劉承寵麟石文六首

陽湖錢相初申甫文一首

陽湖汪岑孫文一首

第二十六卷

陽湖蔣學沂小松菰米山房文十六首

馬經目
三
第二十七卷

武進汪士進逸雲鬢雲軒文八首

陽湖陸黼恩紫峰讀秋水齋文五首

第二十八卷

陽湖莊受祺衛生楓南山館文六首

武進莊士敏仲求能懼思齋文四首

第二十九卷

陽湖湯成彥秋史聽雲僊館文十四首

第三十卷

陽湖楊傳第聽臚汀鷺文三首

陽湖蔣日豫伯石問奇堂文八首

江陰夏焯如永曦南陔堂文四首

江陰何栻廉防悔餘菴文二首

武進管樂才叔游養心齋文一首

第三十一卷

敘錄一首

右錄卷第略以諸先生輩行爲後先洪幼懷子
齡兄弟在孫趙前者則以子從父明一家之學
張成孫亦然其餘零章斷簡各以類相埒焉光
緒十有六年十月錄畢武進屠寄

國朝常州駢體文錄卷第一目

湖海樓文二十一首

宜興陳維崧其年

滕王閣賦

銅雀瓦賦

白丁香簪賦

并敘

靈巖寺重建大殿碑

劉沛元詩古文敘

周櫟園先生尺牘新鈔敘

吳天章蓮洋集敘

方素伯集敘

龔琅霞湘笙閣詩集敘

董少楹詩集敘

上龔芝麓先生書

與張芑山先生書

荅周壽王書

與芝麓先生書

上芝麓先生書

與陳際叔書

謝柯翰周惠鑑扇啟

謝友人賚安石榴啟

楊俊三誄

祭侯仲衡先生文

祭同學董文友文

國朝常州駢體文錄卷第一目

國朝常州駢體文錄卷第一

湖海樓文

宜興陳維崧其年

滕王閣賦

自昔沁水餘公主之園清漳有王孫之第藍田稱廢將之家青門實故侯之地家居小巷人傳丞相之賓田近南山客言太后之弟或北接銅街或南通金市況夫長樂貴胄東阿幼王苑齊博望系自平陽出龍樓而婉婉開朱邸以徜徉梁孝則廣通賓客蕭繹則雅善文章淮南之山名桂樹楚國之臺號高唐頃之秦宮艸綠魏殿煙黃雖有子晉吹笙之館陳思挾瑟之場上黃侯之離臺別園竟陵王之玉柱金觴亦復銷沈歇絕仿佛旁皇笙歌散兮風月盡亭榭虛兮羅綺傷沈初明之才情上通天而下泣陸士衡之

意氣弔銅雀而霜裳是知世何人之不促人何世之能長
徒賦哀於景福祇寄慨於靈光而已原夫滕王閣者地接
衡廬天分吳楚灌嬰洗馬之城殷羨投書之渚南昌乃三
江之咽喉洪都亦五湖之門戶名藩旣竹木爲園愛子復
芙蓉爲府徐劉應教依稀江上之簾櫳潘左陪軒隱約樓
頭之簫鼓然而千年觀閣百代江山戴嬌大去鄮子無還
哀美人兮淚盡怨公子兮衣單念解華兮何極悲粵月兮
難言沿夫明季之將衰也飛燕長安李粵河北江陵之文
武道消洛下之衣冠運息千重白馬之軍萬騎黑山之賊
倚弓於鸚鵡窗前繫馬於鳳皇樓側空餘玉樹之悲猶見
金人之泣繫結綺與臨春奚茲閣之如昔無何

皇清永奠玉燭初調吳明徹則投身周境庾子山則辭跡
梁朝韓擒虎折衝軍壘溫子昇出入宮僚斥埃少燐煙之

警士女多清晏之謠妙選重臣用綏江服庾征西以重望
特鎮武昌郗太傅以名賢坐備姑孰領軍則秩擬儀同假
節則位崇左僕蓋我蔡公實以御史大夫出領豫章爲一
時名節度使焉時則四境無虞一軍多暇陶侃之姿制慄
慨羊祜之標期儒雅溯疇曩而神傷顧景物而心寫撫靈
構於前人嗣神功於來者脊斯閣以裴回獨蒞情而瀟灑
爰乃召輪般徵梗枻不煩將作之匠寧費水衡之錢結驚
鸞之窈窕窮舞鳳之嫵媚儼雕甍之宛爾恍繡闥之依然
伊左縈而右拂羌前紆而後旋爰乃朱樓懸互綺疏蔥蒨
曲房窈窕高臺婉轉鑿桂榭之玲瓏擬華欄之繾綣勢未
整而欲斜狀將翔而又變丹青圖畫有若神仙飾之翠羽
錯以金鉤鴛鴦起於梁上玫瑰生於棟閒斜通闥闥遙接
平原俗類數錢之市地疑種玉之田田寶之居縹緲金張

之宅蟬聯則見夫靚妝士女青驄少年商民輻輳錢貝喧
闐咿咿畫角之聲江城夜市歷歷紗窗之下秋水晴川一
騎琵琶彈來檻外萬家燈火照去闌前於是闔府參佐之
徒蟬翼翩翩丹輪玳瑁輕俊則庾氏肩吾雕華則劉家孝
綽飛羽觴而陵亂眎長空而橫薄陪公譙於中天極勝遊
於高閣維玉管與金簫遂臨風而競作則有激波噴飲洪
濤渺茫江名彭蠡湖曰鄱陽賈客黃龍之舫估師朱雀之
航蕩子以明珠作檝倡家以白玉爲檣西風起兮鳬雁飛
煙波冷兮菱芡長垂畫簾於江上擊大鼓於中塘又若南
浦層巒西山崇嶺香鑪幽邃以逶迤石鏡礪砢而溟滓洪
崖虧蔽夫金梯匡廬隱現夫丹井朝暉無自匿之鮮玄夜
有長舒之景峻言巖畔之寒飈訝山閒之冷華棖與碧障
俱縣綺戶與翠微相映爰乃肆開朱牖盡啟羅幃玉顏旣

醉銀箏未收幕府筵終臨高臺而懷古元戎畫靜列巨艦
而悲秋思夫帝子旌旂兮風流相賞江山文藻兮賓朋頽
仰金棗長纓兮銀蠶猶朗朱門寂寞兮淶池惆悵惟物華
之如故兮悼斯人之一往悲舞館與歌樓兮但長天之明
爽思夫閭公檠戟兮都督簪纓子安詞賦兮文筆縱橫將
軍愛士兮年少能文藝林勝事兮末座知名彼星移而物
換兮見水綠而山青悵賢王之臺榭兮想詞客之生平於
斯時也悲不自勝泣將何及王長史之登山悵眺極多衛
叔寶之渡江蒼茫交集矧復羈人顛顛塞客參差何年泣
別幾度相思攀桃李兮三千里贈蘼蕪兮十二時目斷清
衣之信魂消織錦之詞又或王粲從軍徐陵負羽官道致
餞東門出祖參軍之供帳傾城都護之刀環極浦別蛾眉
今在二八望龍額兮在三五更或妾家燕趙君住河汾君

憐紅粉妾念羅裳製豔曲兮未敢忘懷異香兮不忍熏抱
衾稠兮獨宿冀砧杵兮相聞正復登高望遠覩物懷人倚
危闌而踟躕臨複閣而逡巡公乃凭檻而歌振衣而顧對
景兮移情類今兮弔古授簡鄒枚使爲之賦賦曰飛觀鬱
嵯峨平臺捫鳶蘿杳恩還卻月屈戌正橫波金尊應對酒
玉貌恰當歌絕殊三閣外秋雨翦輕羅又曰千秋間此閣
形勝據名邦檻下芙蓉竝樓頭蛺蝶雙王侯不可見花月
爲誰長朱闌七十二面面落空江僕本恨人遭逢苦辛潘
岳騎省之年尙餘一歲陸厥凋零之日已過三齡未躬逢
夫讌會徒馳想夫風雲王門養炬抽筆於茂弘之座謝家
覽舉揮豪於安石之庭茂弘安石謂五叔祖實菴太史也遂乃終起而爲
之亂曰滕王閣兮江之汜作巨鎮兮奠方軌邦之人兮康
且喜風俗醇兮政事美公之德兮在南紀長無極兮永終

祀

銅雀瓦賦

魏帳未縣鄴臺初築複道表延綺窗交屬雕甍繡棟矗十里之妝樓金埒銅溝響六宮之脂盃庭棲比翼之禽戶種相思之木馭娑前殿遜彼清陰柏梁舊寢嗤其局蹐無何而墓田渺渺風雨離離泣三千之粉黛傷二八之蛾眉雖有彈基愛子傳粉佳兒分香妙伎賣履妖姬與夫楊林之羅襪西陵之玉肌無不煙消灰滅矢激星移何暇問黃初之軼事銅雀之荒基也哉春艸黃復綠漳流去不還只有千年遺瓦在曾向高臺覆玉顏

白丁香萼賦

并敘

余居停主人蔣元膚砌畔種有此萼三春欲算萼開似雪元膚隔牆呼飲并言每歲有紫萼半樹交枝竝跼掩映殊

佳今紫者萎矣屬余有騎省之悼一聆斯語泣然不知涕泗之何從也聊爲賦之其辭曰

爾其鸞壓半欄香籠一樹蒼小偏嬌苞纖逾嬋甫麗歎以酥融旋紛披而綺互初掩冉以臨風復鈴屢而祛雨況復銅駝巷側丹鳳城隈春淡緩去夏淺徐來訝雕欄之鮮杏憐綺閣之無梅候尙遲夫芍藥節未屆乎玫瑰此鸞於是呈皓質綻瓊腮歌宛轉舞韋韞春無霜兮霜泥泥晝靡月兮月皚皚越豔聞名喚作枕邊之墜珥燕姬耀首折爲馬上之橫釵何能不翫茗華而製賦眄玉樹以停杯也哉疇昔之年雙鸞可憐參差竝媚攬抱交妍倏紫姑之不見俄紫玉之成煙鸞謝兮紫臺難到月沈兮紫府誰圓賸一堆之粉淚溼萬縷之香絲桐是孤生莫綰同心之結藥名獨活空思續命之緣惜此離於綺節託惆悵於哀弦春去兮

堂堂鸞閣今斷腸願將鸞下土燒作紫鴛鴦

靈巖寺重建大殿碑

蓋間須彌蘭若卽號青鴛洛下伽藍原稱白馬永興推宅
恆鐫淨果於許詢宜壽聞鐘長託勝因於荀勗絳雲成蓋
人間開舍利之城綠玉爲階海上現辟支之佛何必蓮河
蔥嶺給孤始解捐金豈惟驚苑蛟江大士方能捨室吳郡
靈巖山者具區勝壤硯石名山離宮標越絕之書張樂夸
吳都之賦煙濤歎礪朱長文錄入圖經川瀆紛綸孫承佑
形爲塔記若其旁綴由姑斜垂青巘峰連鄧尉纓綺岫以
攢霄徑轉車箱冠朱峰而礙日四百八十蒼蒼蒼葛之林
三萬六千淼淼芰荷之所縈晴結暝太湖伴佛髻以偕青
醺水縹煙兩崦共天鸞而竝翠一聲谷響疑廣講院之鐘
三闕漁歌似亂梵窗之唄筠籠荀箬風送茶舫蕙畝松寮

雨沾煤屐展矣塵寰之淨域洵哉欲界之仙都爾其沃壤
眠芊平疇與衍秋清獨眺閭門之萬瓦爭流春霽遙看茂
苑之孤城入畫金椎市路毬門牙杖之家鐵埽盈衢里僧
市魁之窟況夫名都故址霸業遺基兔葵燕麥盡昔王酣
讌之場綠水丹山半過客悲歌之地前塵一去館娃無響
屨之廊舊蹟猶存宮監乏采香之港綺羅奚代惻愴偏多
簫鼓何年流連曷極魚山一曲翻成迦葉之居狶巷三條
難問要離之冢亦曰悴哉吁其慘矣假使城上高臺不遊
麋鹿古來樂事長屬爽鳩梧宮無一夜之愁浣女有千年
之笑闔閭無恙山中之劍氣還騰伍相重來市上之簫聲
未歇則秦關錦砌常依繡領宮前蜀地等磚永休摩訶池
上汾河月白年年明鶴雀之樓淮水波紅夜夜浴鴛鴦之
殿無如繡囊慣解金鏡能虧蕭條棧閣偏增望帝之悲屑

瑟闌河彌切憤王之恨潮鳴文種空喧賽鼓於傳芭谷應
公孫祇唱迎神於醉覲銀牀屈曲徒盛玉女之漿石鏡晶
熒終類武擔之石此則天親菩薩樂施懺悔之方香積如
來願杖皈依之力也於是七重闌楯代植祇林五色琉璃
時修蓮界鐙然多寶醒歷劫之沈迷經演三車救眾生之
熱惱架瓊梯於震旦構紺榭以由旬寺所由來爰云舊矣
然而迢迢貧里亦有平陂寂寂化城非無隆替河傾酸棗
波漂鹿女之經酸縱咸陽灰隼鴿王之座岿堯寶樹攀少
室以恒彫杳講慈航渡恆河而每個鬼謀人社濫及寧宮
星貫天錢償之柰苑不有所廢其何以興此千秋金刹每
落纏繚於前朝而六代琳宮仍矢棘輦飛於今日者也
然其始也廬峰乍闢豈能銀殿飛來漢觀初成未必玉梁
自下離毛徒禿詎便成橋蜃氣空噓焉能結市不藉鴛鴦

馬一
之願靈還龍樹之觀時則沙門僧鑑者妙湧言泉廣揮智
刃既貫粦而卓錫復插艸而唱緣金容再煥艱同夸父之
移山香界還新勇比秦王之鞭石菴羅之樹又見華開必
鉢之林重聞鳥囀信屬金仙之呵護尤資善信之捐施凡
諸居士誰非喜捨之蘭陀維我宰官本是再來之摩詰於
是伐彼青珉鏤之紫篆珊瑚七尺春蠶織無量之碑鸚鵡
雙棲古蔓繡頭陀之碣

劉師元詩古文敘

今天下能文章善詞賦非所稱文人才士哉然而遭世嘗
議與物鑿枘邁會蹈機動而獲咎興思事故實亦有三一
者標致誕逸神智曠邁接引聲勢抗立崖岸楊子幼黷狷
之傷杜周甫峭激之累二者詞氣英俊姿制清綺濬自才
鋒了非依傍耗歲月於藩囿棄形骸於土木一篇之工萬

事都廢三者揮斥世資惑溺上靈體撰宮殿則般輪集於鉛槧形狀歌舞則牙涓轉於豪素莫不炫等空弩勾同海東盛憲於以天其年命王勃於以絕其榮華以是三者瑕隙所構行路見尤輕華之譏里閭不齒至於紆青拖紫之彥剖符分竹之人愈相駭愕每加離異吾友梁溪劉子沛元所謂文人才士者非卯年均終賈才踰崔蔡一門昆季如震修膠丹敦白出蒼諸君莫不懷文抱質有漢太學五劉之譽沛元又溫厚淳謹推誠結納與人涉物無間燥慍是其人宜能作渭水之賦而轆轤不類於敬通賦零雨之篇而幽憂不擬於正長也乃今客遊西泠者兩彌月日與二三布衣兄弟歌嘆辛苦鋪敘清婉錦台諸公深相玩羨僕雖疏傲滋愧不如嗟乎沛元抑僕所云文人才士三者之爲累也人亦有言窮而後工劉生劉生今雖少失意非

終窮也然則以所爲工沛元終當任之以所爲窮僕亦何多讓焉

周櫟園先生尺牘新鈔敘

粵稽書名六庫類有千端苑稱七略義非一族纂華林之丹槩文體彌新綜玄圃之綈緇才縫逾整謠歌騷賦攄壯采於篇章頌表箴銘運英裁於述作傷往則旨深於哀諫切今則議蔚於論策以暨九章七啟靡非才子之流泊乎賓戲客難大有風人之致語其變態巧脉不能窺測其繇思哲匠莫能算今之尺牘蓋其一也彼夫體制可得言焉若乃屢及齊郊柝聞邾邑荀罃不返先軫難歸旣轍亂以旗靡復主憂而臣辱楚昭多難悲三戶之累臣許穆無援痛阿邛之弱女臨關歎息願登子反之牀叩壘躊躇冀射魯連之矢事當呼吸磨盾以書變在須臾絕城而下亦有

疏勒流官燉煌降將蕭綜北去憐廟社以何依符朗南奔
望鄉園而不見朱戴路遠魂消蠻海之旌旗白馬營空腸
斷瘴江之鉦鼓謖美人與愛子贈明鏡與金環子卿足下
疇昔可知伯之君侯生平已矣若乃賤臣邁謫庶女蒙冤
江淹乃善恨之人馮衍亦多愁之客三年獲譴永無造請
之期盡室遭俘長罷歡娛之日母今天只臣不如人思刺
血以陳情念上書而訟枉又有密親暫隔懿友長離感時
物以流思對景光而結想尹班契闊可無知己之言樂衛
睽違寧乏相思之句敘苦辛於一介寄輾轉於數行宛矣
瓊窗居然蘭畝更有紅粉樓頭青牛帳裏君居塞北妾住
江南攀桃李以悲來顧綺羅而泣下吹簫公主嚙雅怨於
朱脣織錦姬人論私情於纖手凡斯之類皆藉於書時則
北路名流南朝文士阮元瑜之書記久已流傳蕭大圓之

尺牘益爲膾炙爰乃襲此赫蹏命茲側理膠東河北竝馳
五色之箋大令中郎互競連珠之格爾其爲體也或磊落
以見才或嵯峨以植旨或首尾以溫麗或締構之縝密或
文辭簡要情片語而已該或思理淹通氣百函而彌厲或
臨池詳慎細蟠楮裏之蠅或握管飛騰橫跳天門之虎鏗
鏘可聽塗山之玉帛萬重藻纈堪觀赤城之雲霞千丈入
劉家之世說卽是蘭苕登蕭氏之高齋無非琬玉輓近以
還此風不嗣原其流弊厥有三端顧陸華宗潘楊妙族金
貂翠珥望若神仙坐褥隱囊便爲卿相寒暄筆札都由呂
覽之門生故舊書箋盡出桓溫之幕客且也貴僚雖雅惟
傳論性之篇華札翻反爭諱言情之牘其有擬鮪欽應璩
之書效邢邵崔陵之札者呵爲小子目以外篇其所爲難
一也且夫燕函越縛各有便安秋弈僚九悉由熟習敝執

自麗不懽北轍之夫狐羈雖溫難說南轅之客今也單門
寒畯絳掖素流祗工制舉之書但慕集賢之院卽使才同
孝穆文類子山無益身名徒資嗛嗛加之遭逢踽踽罕西
園北府之遊徒侶寥寥乏華屋淶池之彥事蹟不足以供
鋪敘爵里不足以寄選擇其所爲難二也古者飛書馳檄
盡筵戎旃記室軍諮雅多才俊兩軍相遇必以辭令爲長
一使相將尤以語言爲尙今則三臺大帥九姓名王行人
無僑札之才儉介鉅向嬰之輩紇庫干自署不識姓名曹
景宗作歌難諧競病一時風會殆何如乎下至閭閻又可
知矣其所爲難三也然而星移代換何世無賢壁坐璣馳
孰云非寶此新都夫子旣顏麗製以清裁櫟下先生復選
鴻文於賴古矣嗟夫曩遊不再自古爲悲後聚難期於今
所歎匪勞音驛莫慰幽憂不事箋緝奚通繾綣遂乃領諸

家之秀采薰以名香錄百氏之芳華裝之異錦寄來黃犬
半漆書竹簡之古文損罷文鱗悉篋衍巾箱之胜錄副諸
記室掌以典籤

吳天章蓮洋集敘

今使酒酣以往設爲鄒陽宋玉之大言金盡之時繆作徐
福藥巴之謾語遂已室有園廬家餘井碓牛衣馬磨僅足
相容雁稅魚租粗能自給碧畦半畝便爲庾信之園素壠
一區卽是潘尼之館頽縈弱蔓等是恆春紺裊柔柯藥名
半夏繞徑植繇欽之蕙隔離栽馮衍之薑閒居徐邈尙有
酒鎔暇日陰鏗非無荇鉞則鑿坏而遁雖頗領其何傷帶
索而歌但寂寥其奚悔而乃東都公子歲歲依人西鄂詞
流年年失職果赫臚蛤都無頽仰之資廬舍陂池總乏棲
遲之所寂寂梁家之竈蕭蕭卓氏之壚擬獻賦而未能縱

著書其何益井公善博索笑奚來韓子能文送窮不去於
是轉徙燕齊崎嶇梁趙須如蝟磔只欲橫鞭弩作鴟張偏
思縛袴所過礪礪古戍祓祠空壕赫連臺北從來螳鬪之
場禿髮城南昔日狐鳴之地鵲巢似血營前之筆策何多
斑竹如嘯帳後之琵琶不少窮魚茹怨凍雀銜悲紫臺無
暫返之賓白社有難歸之客然而才性英奇辭鋒卓犖盾
邊磨墨彌工變徵之聲驛裏題詩大有陽春之調車前騶
卒偕飲酒以何妨塞下荒倉共彈箏而亦可千篇揮纚同
天馬之摩空萬象淋漓類巴船之出峽揚雄嘗吃雅擅攤
經梁肅重腿尤精製賦此蓮洋吳子相傳七發之篇而笠
澤陳生爲作三都之敘也嗟乎兩戒河山二陵風雨上黨
實九州之脊河中爲四塞之雄雅兒峪口美人與駿馬安
歸鸛雀樓前廢寢共荒陵奚在太行日紫憶百戰之旌旗

汾水波紅想三秋之簫鼓空尋斷碣祇剔殘碑所歎吾賢
復生斯地頗傳殿上競誇才子之名莫便山中願息高人
之駕

方素伯集敘

粵自結繩而降漸啟文明書契以還代傳謨誥孤桐浮磬
律既審於后夔黃竹白雲韻復釐於穆滿邠金當璧竝熾
才華典午膺圖彌耽風藻大同天監益去兩京之遺元和
景龍猶仍六季之習凡茲鉛槧悉稔吟謠不預斯流何名
才子譬之枇杷盧橘無非上苑所充霧縠冰紈皆是後宮
所御高陽殿內小侯之璫珥千重金谷園中都尉之珊瑚
十丈作昭明之學士尙有高齋人記室之詩評已多上品
東南孔雀句裏皆金西北浮雲行間盡玉皖桐方素伯者
金龜壓紐代有要人黃雀投環世畱陰德陸士衡之祖父

累躋台司劉孝綽之高曾風登鼎鉉若乃少郎清通幼而
岐嶷徐孝穆綺才第一疇訝其青王威明妙譽無雙胞傳
其紫童年揖客解對楊梅暇日揮豪能題芍藥命不猶人
生逢多難楊家德祖庾氏子山一則丁炎祚之將傾一則
值蕭家之既殄關東蛾賊白馬如風河北雅兒青袍似艸
辰傾岳圯宋微子有麥秀之歌國破家亡周大夫有黍離
之歎時則尊府君密之先生義激兵瀾忠騰甲庫攀車痛
哭誼切王琨撫狄沾衿情均索靖無何晉宗馬渡不用王
導之言齊埭雞鳴惟任褚淵之輩先生既閒關宵遁素伯
亦襁褓南奔亡命蠻邦避讐領表蜩蟻離水夜夜回腸雁
阻衡陽朝朝掩涕魏安釐之母弟質邯鄲而不歸庾肩吾
之愛子望江東而難返地名海角人是客兒時則素伯雖
質亞生知而年猶未學迨乎王琳失路事去南梁鄧艾縋

兵運移西蜀廬江何肩遂返鄉園吳興沈炯言旋京國年
當毀齒雅有饌乎百家時甫勝衣已筮簣乎六籍齊諧諾
皋之志無不流連馬蹏秋水之篇咸歸披覽珠生合浦便
多結綵之名劍出豐城還擅干將之號張正見冠世才情
五言尤善左太冲軼羣筆札三賦猶工何殊翡翠之牀不
異碑礫之枕然而情淡君父齋種白楊身歷興衰曲多紅
豆蕭大圓之書牘頗聞辛愧居多劉越石之詩章惟以悲
涼爲主況復文武道衰衣冠數盡徐陵旣老誰說華宗李
廣不封疇憐故將十齡公子賣裘裏之明珠七世王孫露
腰間之寶琇借來祕本悉皆市上之書鑿得微光不過鄰
家之火於是反袂以歌臨文而歎陳思王之上表臣獨何
人陶泉明之自祭將爲異物吳歌魯酒詎足忘憂懷豔楚
騷差堪破涕僕與諸方交惟兩世誦謝家之妙製尤喜阿

連逢何氏之佳兒絕憐第五用爲茲敘聊申膠漆之歡略
寄斯懷豈待鱗鴻之請

龔琅霞湘笙閣詩集敘

原夫斷錦梭龍驚心奚極哀弦柱雁蕩魄何言文人生戎
馬之中詞客遘亂離之會靈和前殿小侯射楊柳之旗華
林後園公主試桃萼之馬過雀臺而獻帛亦有名流入馬
邑而生悲非無上將風月供其悵望江山助其悲懷余友
琅霞龔子四姓良家五陵妙族朱門鬬鴨識桓氏之家郎
金市乘羊訪衛家之年少弱齡十五愛此吹笙上客三千
驚其拙簞家近長干之縣夙解看鸞人居蘭陵之街偏能
賣酒無何而葛榮入北塵暗三臺侯景投南溪馳十郡齊
亡之日誰知袁粲之子孫吳淞之年尙有陸機之兄弟雕
弧乍熄遂射策於春宮羌笛未終便計偕於易水馬援辭

隴香續如龍庾信入關油車似霧貂蟬盈座盡北魏之儀
同簫鼓當筵遇西宮之協律衣熏胡粉還迎塞上之姬細
蒨宮香或贈幽州之客固已譽馳滕趙名重幽并況復性
愛琵琶尤工弦索紫檀作撥句句離鴻金粟爲牀聲聲別
鵲雞鳴埭上人傳子野之歌庾家墓邊伎識王郎之曲才
情第一風調無雙嗟乎碧艸粘天盡是思鄉之客黃塵而
地誰非去國之人袁大捨之妝臺風飄蟬鬢馮小憐之畫
閣月照燕釵賦號蕪城文成枯樹欣逢才子悵覩名篇自
愧陳人難忘新曲當年宋玉應有雄風此日王筠空吟雌
霓云爾

董少楹詩集敘

嵯峨金竈人間無煉骨之方嗚咽銀箏天上有銷魂之曲
南都石黛恆畫愁蛾北里燕支彌承泣臉張衡處機密而

不樂劉楨限掖垣以長愁地老天荒鰥鶴怨於是華堂
失火燕雀俱焚滄海無波蛟龍立盡梁世之金樓半隳陳
家之玉樹何歸故國王孫淚灑腰間之玳辭鄉公主心傷
昇土之詩建業風流一朝零落江陵文武千載淒涼八王
旣自賊於中五帥復不歸於外嵇康被議撫愛女以託人
范曄臨刑顧名倡而隕泣食子都無下意傷哉蕭賁之談
下官不解箸書達矣上黃之語時則城名白紵獨數董公
系本烏衣尤推德仲申包胥倚牆七日毛修之亡命三年
蚤歲聲華便如潘陸壯齡遭際略類庾徐令子少楹居然
俊物羨北朝之甲第父是崔陵問南國之門風兒稱孫策
楊梅作對傳是童年鸚鵡成篇由於半刻銅盤會食炊金
饌玉之家丸髻行歌換羽移商之伎巷頭梔子皆是同心
園內諶參無非獨念石尉之珊瑚碎後汎譽豪奢王郎之

團扇擎來人憐放誕畫眉京兆比此非奇使酒將軍擬斯
應遜尤工文筆酷擅才情東海三何時有絲情之作西宮
二應不無累德之言體格輕華情文悱惻頭陀寺裏爭看
才子之碑景福殿前競寫名流之賦雲霞十丈如遊樊重
之門金粉千重似入王根之宅僕本恨人生丁亂世覩夷
光之貌憎類無鹽讀君山之書歡踰倚頓舊有清河之癖
甘作狂夫新爲記室之評慚非傑作不辭立晏願附青箱
上龔芝麓先生書

維崧頓首獻書芝麓先生閣下嗣頃玉樹歌殘黃旗氣黯
西京掌故南朝文筆便已散失都無哀次音辭所寄惟在
閣下維崧東吳之年少也才智誕放骨肉躁脫當塗貴游
目之輕狂嚮者粗習聲律略解組織雕蟲末技猥爲陳黃
門方簡討李舍人諸公所品藻歲月不居二十年於茲徒

以揚子幼之門第華轂不少王茂宏之子孫青箱遂多上
不敢方井大春次不至失枚少孺一流將盡如是而已且
夫軒皇愛嫫母之貌而黜落其魏文喜棓鑿之聲而棄金
石中山間幼眇以屑涕墨子過朝歌而同車何代無賢古
今同歎崧竊不自量有所撰述矣以爲庶女標躡長城摧
頽賤臣撫箏譏疑渙釋聲音之際窮高極微從乎同同也
是以失職以來間與錢塘陸圻毛先舒華亭彭師度周積
賢嘉興計東長洲宋實穎輩揚摧雅頌撰爲一集崧雖譴
陋顧諸子皆一時之選也每與駿公吳先生言及此事未
嘗不撫掌於應徐也屢誦閣下尊拙齋集玩之不置均於
玉枕過高唐而近縣駒亦欲一倣其音聲也辭賦一道古
詩之流遠溯漢魏近迄開天尙矣然八風旣殊五音迭異
江表輕浮貽譏吳語僞楚沈雄亦類老革夫青青河畔艸

竝非造設明月照高樓了無擬議劉越石繞指之語曹顏
遠合離之篇景宗武夫悲歌競病斛律北將製曲牛羊意
者榦之以風骨不如標之以興會也然乎否乎幸賜發覆
焉前叩行臺未見從者謹陳書左右以敘鄙衷二詩塵覽
并希郢和邯鄲託曲於李奇王筠假論於沈約安冀一言
以爲重耳

與張芑山先生書

崧自結髮以來謬叨獎掖猥蒙齒牙已十四載矣嗣頃戎
馬朝張世故潏洞眷言疇曩可爲涕淚自鹿溪被難皋里
赴義秋浦效田光之奇雲間秉劉琨之節何嘗不似琅邪
登山洗馬渡江無非觸目祗切傷心者乎春閒跪奉素書
扇頭珠玉之贈并讀芑山文集剖函發紙周惻霽至又聞
有

國朝古文之選言之歡忭誠經國大業不朽盛事也崧昔
年石城數從次尾師游出所撰國瑋集相示絕嘆爲經術
暢茂搜葺詳雅無何而觸機蹈故此書不傳竟作裴氏之
語林有遜蕭統之文選言之可爲感傷先生是書務使漢
魏竝收根葉悉盛廟堂金石之篇則吳門姚太史崔張惠
其溫麗軍國銘頌之作則清漳黃相國馬鄭慚其閎博竝
人倫領袖文章皋藪被之山川不亦焜耀萬禩乎若夫平
昔石交當時民望嵇阮往復之言盧劉贈答之作便已斐
然自當見收匠哲也詩曰采芣采芣無以下體抑芻蕘所
摭願效萬一者文章以心術爲根抵德行以藻采爲鏗鏘
穢如揚雄雖沈博絕麗之文定屬外篇潔如陶潛則閨房
情致之賦不妨極筆竊見數年來江東英雋如侯幾道雲
俱夏存古呂石香陸鯤庭諸子稽其忠孝宛在賢門符其

點染居然才子雖大文未就而尺錦足觀名山罕減而寸珠可惜錄其風雅之事登之謨誥之林又奚損耶匪徒藝苑之鼓吹實乃闡揚之裨助矣

荅周壽王書

壽王足下昔臨淄荅公子之書僕射報故人之札枚臯淹麗敘懇款於篇章謝朓清華譜中誠於牋奏以及曹家二妙蕭氏諸王李邕塞北之篇邱遲江南之作上下曩往代有其人千餘年間若斯而已何者明月不投於瓦礫梗枿不列於朽株珠玉以竝御爲榮宮商以同縣爲樂也足下汎南闕閱江表聲華許元度之清通裴叔則之名理景顧則以李膺爲師趙至則以嵇康爲友樂旨潘筆固已萃爲一人輟謝陵顏奚得離爲二美何圖中路隘及鄙人辭旨慙勤情文剴切壽王足下文人相輕自古有之況在今日

尤可歎息憶昔攜李共相締結刻覈文史攷据經術孫龍
堅白之辨晰其源流白虎同異之解闡其堂奧興公賦體
赤城之霞氣千里子山敘言玄武之明珠六寸僕方引藉
若輕塵之御順風君更謙沖若腹囊之資背羽時有口語
橫屬詆嫫加以清狂目爲輕率嗟乎此敬通掉頭於渭水
子幼耳熱於南山元叔有囊錢之悲孟博抱清流之歎也
且夫鐘鼓以響爰居千金乃資徹帚騏驎與駑駘同阜鴻
鵠與燕雀爲羣自古而然於今爲烈若使盛憲之年易永
張衡之志不愁酈文勝不緯繡於范陽崔亭伯不煩紆於
涿郡則雍門之畔虛傳累歛之賓黍谷之陰果有噓枯之
用矣詳味來旨纏繚鋪敘至所深羨似在鄙人此足下愛
我之談非古人相知之論也僕之兄弟雖粗涉文筆未升
堂奧乃者時勢違會構遇坎壈邨太傅之亂離戴處士之

棲寂時復咏史租船哀其清厲負薪鹿車悼其辛苦而足
下嘯歌自適篇籍爲歡朝翔於藝圃之中放誕於塵埃之
表何其悖也豈足悲哉近聞灌夫有同產之服子猷有登
牀之言則僕與足下人倫之際榮瘁殊途然而疏密之間
悲愁一致也今夫韓起雙環何能竝見張華兩劍豈必俱
來是以天忌其才豈止人惜其寶足下雖誼深如手哀篤
同生而覽舉封胡尙餘二少到漑到洽不止一人奚乃技
輟成連遂至弦摧促柱乎至於足下誤述尤屬必傳譽重
靈蛇珍同和璧而足下虞其覆瓿遽欲焚硯患其蠟屐頗
懷投筆此在鄙人實所未喻夫樊重之宅必有瑰麗之觀
王根之家自多妍華之飾倘非世猶繩結人盡空桑焉能
置芳澤而不陳黜鉛華而弗御是以驪宮雖誓猶傳蕩魄
之言香國雖賒亦箸驚魂之論裴之璫瑁君無間然返之

推輅非所聞命壽王足下宛委之洞屬有藏書西室之山
非無祕錄袁閔土室難與久居蔣謫荒徑未遑塊處歲月
不居毋徒自苦爲也

與芝麓先生書

籍甚芳華彌勞眷戀才慚枚客虛邀梁孝之知曲豈王郎
曾入謝公之聽憶山川之縣麗當賓從之清新拙毫於臨
春結綺之旁授簡則庾信徐陵之輩荀家羣少夜夜薰香
何氏諸郎朝朝傅粉奚圖下走亦遇明公依劉於石子岡
頭御李於莫愁湖上嗟平生也不辰幼遭離亂陸機去國
竟逢吳室之亡伍員知幾預料越兵之入對成孔雀自悔
才華賦就鴛鴦尤憎離別於是操弦泣下搥管悲來北渡
蕭綜時間落葉南歸符朗每見江流客自傭奴鮮擊堂前
之筑人非太子能吹天上之笙固已箭泣長楊豈但河悲

酸棗自別以來心焉如掇朝看分野但直牽牛北望闕河
莫逢征雁恆銜觴而屑涕閒引鏡以回腸不自知其爲愁
不自知其爲苦也僕之佗僚巧厯莫算緣其邁閔厥亦有
三僕家珣貂蟬世叨恩澤丹輪絡繹人傳王謝之門白塵
連翩世曰袁楊之裔而壯逢淪賤晚會流離鐵籠宗人翻
欲泄田單之族葛衣公子空思謁任昉之賓豈衣冠之選
自昔原開而門第之科於今永閉斯僕之自恨者一也許
子將月旦士林郭有道人倫東國僕之祖父庶幾似之屬
漢祚之將衰乃黨人之不競部分南北盡是房周京異東
西誰爲晉鄭而天心稔亂人事多攜洛陽市上未然董卓
之腦晉陽城中尙睥華元之目遂使合浦之珠已盡成都
之卜何從斯僕之自恨者二也王微文藻每歎途窮謝脫
才情屢嗟運盡於茲爲烈自古已然僕涉筆輕華持身狂

躁少工聲律不嫻內則之篇長嘉詩歌風味歸臧之作形容臺殿則思竭於靈光體勢虛無則巧窮於景福而日月不居性靈坐天蘭陵蕭繹懺彼文人楚澤靈均歌夫司命斯僕之自恨者三也以斯三故積有百端加以崔亭伯晏歲多憂張平子閒居不樂學元龍之豪氣難卧高樓豈敬仲之後人慣弄他國江淹賦別衛玠言愁吁其悴矣能不悲乎閣下虎視帝京鷹揚上國行矣雲塗勉旃天路江南艸長特郵季重之書冀北鵠飛望報休璉之札

上芝麓先生書

載別旌門四更冀莢感知慕德泣更劇於蛇珠怨老嗟卑身竟同於燕石馳惶無地哽懼自天譬之越禽戀燠終思近日之鄉代馬銜寒恆有陵飈之氣人之情也能無歎乎粵自南陽雉雠陳寶雞鳴日月炳乎八紘乾坤奠其四極

恩波湛澌北通弱水之邦瑞氣照回東被無龍之國凡夫
稟氣靡不蒙慈獨有文人善於失職餘姚書佐不無拾橡
之時丹陽布衣或類翳桑之客而崧薄劣猥荷帡幪予以
吹噓長其聲價此則蝸毛閭翼悉藉生成枯木朽株咸歸
雕飾頌颺曷極銘鏤奚言自入中原於茲三載託貴游之
後乘廁幸舍之末行徧歷兩河頻經八郡百凡風緒彌觸
悲辛聊借叢談以資撫掌慨自蛾飛玉塞蟻潰金堤既七
聖之路迷亦百王之道盡漢臺晉闕共廢壘以縱橫伊鼎
姜瓖竝頽垣而蕪沒免苑賦詩悵鄒枚之不作吹臺縱酒
盼高李以何從復奚言哉此固然矣若乃邯鄲爲游俠之
魁朝歌乃輕華之窟玫瑰作城東京樊重之家瑋瑁爲梁
西洛石崇之宅或奕洛環之所割據或賀六渾之所攘竊
三條夜啟游騎歌鐘五劇晨開販脂削脯此皆歷代名都

累朝勝域今則空餘風月無復綺羅淇泉罕巧笑之人趙
國乏報恩之士雙肩鰓齒卽曰洛陽女兒蔥肆餅僧便是
叢臺年少詎堪揚扈徒滋悶嘿是以刻意矯除刮磨豪習
孤行陷厲消耗壯心抱蠹簡以終年託螢編而永日玉杯
一卷珠海干函非捐非狂如是而已所幸學善陸沈性甘
微纒賓從念劉楨之疾主客知原憲之貧濁酒素琴差無
患苦宵鐘夜漏聊用襄羊以此自寬毋煩相譬且夫楚腰
信美不登展氏之牀秦缶雖工難說趙王之耳何則意胎
者易爲容而情乖者難爲洽也是以越石抵掌於晏嬰之
側於期掄腕於慶卿之前魏齊亡命乃客虞卿黜蔑不聊
爰投羊舌無他素蒙根柢之知則略其疢疴夙荷優容之
雅則假以羽毛百崧之藉庇甘餘年矣不幸崩摧酷遭割
罰年逾知命尙乏嗣續已成張壯武之心疾時類羊南城

之淚流已於商邱擬置一媵非云曼倩之小妻聊比樂天之粗婢或者李家先德尙產袞師阮氏清門將生遙集蓬頭歷齒矣思以買得爲名執織擎箱謬計以醜奴作氏然而客本畏人居尤不易必賴汝南長者寵以輜輶許下羣公惠之談論此其萍跡或免蓬科倘有高軒入魏幸言朱亥於市中至於絳綬游吳願述伯鸞於廡下用茲仰顙伏冀台慈更有鄙懷統祈尊鑒崧以盧蒲髮短燭武精亾處處擗榆年年翟璜正使石填武擔詎塞愁倉土運黎陽難平恨棧瑤姬無埽塵之竹玉女寡洗頭之盆將畫某公之龍遂牽荀息之馬雖復井公縱博盍能索笑於仙家卽令鍾子刺船詎便移情於海上方今成均廣闢石鼓宏鳴六館之側負笈者三千四庫之旁橫經者十九若獲策其謫劣竭此涓埃一觀太學之碑便脫諸生之籍未知此語果

合事宜竚望台裁以爲進止嗟乎來日大難獨居不樂天上之愁萬里人閒之怨千年困豫且之赤鯉猶然仰沫於洪波燒爨下之焦桐尙爾驚魂於妙曲辭寧敘意書不宣心

與陳際叔書

際叔足下載披新製歡笑無量循環把玩不啻口實慨自江表喪亂文籍散脫掌故流落有同甲帳文史毀棄便類羽陵風尙所期惟在足下今茲書敘大似休璉其餘撰述自多傑作夫以孔璋之才不嫻於詞賦士衡適藻亦以手重見訾固知雕蟲小技未可輕棄也足下諸賦已必傳矣僕才質疏放姿制誕逸頗致藍田狷忿之譏時叢平子輕狂之誚閒有侯芭嗜奇之癖時多吳質好伎之累每當四節之會風日間麗親懿稠密丹輪徐動華軒遂盈當斯時

也賓徒迭進則神思轉給簫笳互激則酬應彌妙昔大梁
侯方域常作文章必須聲伎僕不幸逐似之至於別崇臺
入曲房弛華裳跼利屣銀鐙乍滅文纓已絕臣心最歡才
能一石何論八斗且夫燥溼之理各有其宜動靜之性奚
能一致若使龍泉不試之盤錯騏驎不驟之康莊則羽檄
何以擅長於枚皋書畱何以箸稱於齡石今者塗路旣局
神明有限塊處恍息忽焉終日已失裨謔謀野之助幾蹈
莊交文犧之喻而欲矯厲文采以供撫掌豈可得邪將毋
過高唐而善謳歌臨睢渙而思藻績祇爲欺我無關實事
也會有事務未能牽綴崧白

謝柯翰周惠爐扇啟

裁來皎月詠自班姬滃得香雲製綠丁緩瘦骨截湘妃之
竹蟬雀分行同心煎荀令之香鷓鴣成片睡茱萸之複帳

有鴨皆紅舞翡翠之晴窗無鸞非彩擎諸掌上臧竝匳中
然而九華乍御金獸先囀四和纔烘畫羅遙妒維四時之
代謝故兩美之難兼竝荷蘭閨之澤恨不同時俱邀柝館
之榮愁難相見今某雙承雅貺兩藉殊頒握彼兔華之下
驟識春道擁於麝火之旁旋知秋盡無冬無夏咸銘踰量
之施倏煥倏寒彌切撫時之感

謝友人賚安石榴啟

塵檐宙吒產自塗林隔膜騰脂呼爲丹若張騫查到新移
海外之枝李靖編成夙號天漿之汁旣可施之作枕賦就
張紘還堪染以爲裘詩裁武后縣焉似瘠旣標劉杕之名
重可論斤亦著離斯之國某愁同平子渴類相如幸沾珍
果之頒獲飽上林之味客來筵上累累不夜之珠臧向匳
中歷歷記歌之豆偏譏栗罇殼允青毛欲闕離支綃籠紅

肉詎止伽藍作記白馬寺之甜實直牛須知伯起曾言安
德妃之榴房多子飲君雅意貺我成言

楊俊三誄

維癸巳年七月某日余友楊文學俊三焯卒嗚呼哀哉玉
樹徂春金刀掩夜淑問猶宣惠心永謝嗚呼哀哉君才調
英奇篇章卓絕言泉流吻思風扇脆剖玄晰奧纖若蟬翼
鋪文雕采縉以龍梭南朝人士眷爾清新東第衣冠嗟其
縣麗加以德性幽婉標舉簡令神鋒內歛道器外張雋不
累理淡不卻物故能靜表溫純動形潤栗弱年繡虎雅擅
綺才髫齡蠟鳳頓饒妍慮雄辯驚其父客高名廁於時賢
譽重南金賈侔東箭泊乎運丁百六世遭陽九令先府君
維斗先生忠構身危義積家禍石城哀下白下悲哀君時
竄跡倉皇邁會孤露程嬰轉徙私匿其兒李燮饑寒但依

其姊吳門乞食合浦賣珠晨繡弦以引悽昏促管以會泣
令伯陳情之作極此纏綿右軍誓墓之文彌爲悲惋無何
軍書少弭戎馬暫監親弗稍通音問閒嗣會丹輪於城郭
時有唱酬修輕落於几闥不無贈荅時則金聲逾振玉色
罕渝朱齡石百畱竝發劉穆之五官互用巧心所濬酌而
不竭惠匠所琢剔而益麗樵蘇不爨終焉而已將謂務疏
道親身阻意泰保幽貞於物表棲軒冕於塵區永爲藜藿
之夫甘作丘園之秀而人惡其潔天墜其芳猥以虎豹之
姿竟際龍蛇之歲情深徹瑟慟擬登牀春秋二十有三禍
衡臨歿之年尙虛其一終軍奄逝之紀祇過其三夫人乃
松陵吳茲受先生淑女而吾友弘人間夏漢槎賢妹也劉
氏祭夫手調薑橘徐姬荅外情綢鏡釵鳴呼哀哉爰爲誄

曰

兩儀肇始皇降分區乾坤盤礴氣數昭蘇靈鍾牛斗寶產
句吳頑豔靡均清濁鮮符猗歟是人洵邦之彥秀外惠中
日溫且善學圃增泓文峰日倩宅心簡棲錯躬激練旣稱
第一亦曰無雙藻嫵陸海麗甚潘江文明映物經緯華邦
清瑟聿拊洪鍾旣擬命之不猶國家多難袁有愍孫顧惟
元歎申志悲涼遺言哀斷襍作豫廁浮沈嵇鍛術衰齒盛
道蹇業隆雕鏤羣象染綴化工明詩習禮誦雅歌風魏雀
舜金漢盤泣銅豈其王頑不如沈勁奈何伊人不永其命
大火流暉玉衡移柄巷軫絕弦衢凝分鏡南皮曩侶北府
名儔今悲雨散昔溯風流九京可作萬禩難求青松郭外
紅粉樓頭

祭侯仲衡先生文

丙申春暮余客西興翁訪吾翁扁舟是乘畫溪櫓搖銅峰

展登二老風流觚飛爵騰吾翁見背是年夏月孤子流離
狂弄吳越遇翁武上別翁倉卒漬血交頤含哀刺骨嗟嗟
余弟十四稱孤作贅睢陽單衣路隅上鮮郗公疇憐渚于
卵翼惟翁立其戶樞自古而然俗疵文雅或與翁言彼陳
生者癡王伯與狂桓子野慎勿與通暱生者寡弟歸告兄
嫉彼啁啾兄笑而言彼其何尤翁定知人人言勿憂所恨
於中關河阻脩余到中原實維己酉滎澤波飛成皋雪走
遂踦翁閭與翁握手跌宕詞場激揚文藪宋中四月名筭
盛開大者如梓霞蒸絳堆翁曰觀乎幸子能來繞燧人陵
經開伯臺老輩誰歟徐公健在謂恭士躡電追風君家叔岱
吹竹彈絲呼盧博簊食酒衫污拘筭帽戴聯句浹夕喧阗
譟呼余戲謂翁人言有諸狂耶癡耶夫我何居翁曰非癡
狂應不誣余舞蔗竿脫身而跳翁果知余仰天大笑桂醕

重斟梨園再召篴竹幽軒箏琶絕調余倚酒悲告翁倦遊
擬欲從翁卜其菟裘翁顧徐公叔岱是謀茂陵小婦爲余
訪求嗟嗟聚散何常之有欲別翁歸悲難出口餞我城東
爲余折柳顧語陳生定能來否余指翁言翁乎莫愁人愛
賢豪鷹貪臂韉白月在天酸風射眸余所遲來罰余酒籌
泗水如油淮流若箭別翁半載夢中常見昨者南徐浪篴
雪濺睢州使君召余文謠酒中語我翁竟仙遊余驟而疑
詎有此不嗣後弟書來自商邱發函伸紙涕泗橫流翁之
盛德淵騫曾史翁之精明博聞強記天佑善人豈宜有是
反覆徬徨終無信理所可差慰家有珍琅鳳毛犀角巨闕
干將司成檠戟令子文章翁無憾矣乘雲帝鄉我所聞翁
歿之前夜飲類公榮聲如興霸歌版未收金釭猶瀉揮手
人間奄然而化蟻觀八極驂鸞太清翁齊物化我憶交情

高山不作流水無聲嗚呼已矣盡此生平

祭同學董文友文

於戲我友去年今夜櫟園司農酌余館舍秋霖泚泚街鼓
礮碾子先在焉儼然以厓廣陵宗生新安汪子與我與君
四人而已君時憊甚親几而馮食一溢米酒不半升余心
怵焉口與心計念欲沮君俾無入試君悲久蹟誓奮文場
余言中茹囁囁自傷戰罷而歸江颿若箭東舫西船曠焉
不面涼秋報罷匿景蓬根日薄虞淵子赴在門嗚呼天邪
痛纏心髓重趼狂奔哭君百里嗚呼我友交君廿年詞壇
跳盪文譙流連得艸而呼聞音而喜生我者親相知惟子
子之文學蛟龍蜚螭劇怵胃腸放爲瑋詞投電鞭霆山移
壑飛胸嶮峨陽鐫之剔之子之績學博聞強誦纖窮螭翼
細穿箴孔夾漈後先貴與伯仲射覆發矇應弦而中子之

行誼忠信楷模砥行潔身皦然不污鼓鞀元氣笙簧典謨
英英哲人煌煌大儒其或少時姪直自遂意所齟齬唾猶
泥滓壯而折節刮磨淬礪人或不知畏其鋒銳君少爲文
詭麗萬方中年閭道筆陳堂堂刊落鉛華一歸老蒼而彼
小儒沸猶蜩螗疇昔之言憶其八九君曾語我人生何有
誰爲後死託之不朽誰知君碣遽落吾手一語更悲曾顧
余云昔賢名集廸功舍人最可懼者百年奄忽呼之茂才
以當官闕何知今日果讖斯言方于羅隱萬古同冤而我
識君飄飄雲氣百軸龍文扛之入地鐙闌淚盡濺雨驚沙
百靈惶惑萬感槎枒庭空無人明河欲斜我之哭君醒耶
夢耶倘余未死息壤在彼傳君遺文誨君幼子苟或不然
臣力竭矣柱絕弦摧報君僅此

國朝常州駢體文錄卷第一